

OTTO SAHMANN: Unnera Toooh in Thernaa...

Im Sunne, wenn ka Schull worr, sänn mir Kinne oft
nooch Thernaa (aaf Hochdeitsch: Thurnau) gfoorn, dess
liecht be Kulmboch... Doo hamm me ons buchstäiblich
dess freie Lehm umdenn blaua Himml ne su aafs Bruut
gschtrichn! In aaner Hängemattn sänn me gschauchelt
zwische de Baim - iebere Wiesngartn, där siich leisla
gsenkt hott neina Tool... Unn all de anne Zeit sänn
me schee geborchn gwesn im Haikla vo unnera Vewandtn
mit semm spitzinga Giebl unn Brinnla voe de Tiir...
Doo hamm me ons, mei Schweste Edithla unn iich, su
richtich aasgetobbt - oddr hamm bluße där Katzn zu-
gschaut wie sa gschprunga iss - unn trotzdem wors
als wenn sa schtillstett in de Luft! Miir hamm geahnt:
dess Lehm iss nix als Gechasotz - unn weil me dess nerr
erschert geahnt hamm, worn me fruh... De Gartn draaßn
hott gebliebt, doch aaf na Bänkla worr de kranka Tanta
gsessn -, hott niemols glacht; ihr Gesicht wor scho
satt gelb vo latte Krankett! Unn aamoll, dess vergiß
iich nie, wor unne Onkl Heine vo de Front zehaus; in
seina schwera Stiefl unn de Uniform iss är ne aaf unn
obbgetiechet -, ne aaf unn obb; miir hamm na nimme
gsäing... Dess Zimme, wu dess worr, iss seitdem in
meim Kuupf gleichwie-era Kuuchl! Iss ess de Kuuchl, de
mein arma Onkl draaßn trooffn hott?... Jo wirklich, iich
hobbs gmerkt, dess Lehm worr nett su aafach: Im Gartn
sänn aa mancha Pflanzn unne Gloosscheim gwesn; doo
drinna hotts su gut gerochn nooch de Schneckn unn de
fetta Erd'! Dess Glos worr freilich hart unn schoorf;
ess hott de waachn Erdn siche wehtoo! A Zwischestuufn
hott doo gfeilt; dess hobb iich dumpf scho gschpiert!
